



FYLKESMANNEN
I ROGALAND

Dykkar ref.:

Vår dato: 26.06.2017
Vår ref.: 2017/2511
Arkivnr.: 433.0

Peter Sigmundstad
Nesvegen 184
4139 FISTER

Postadresse:
Postboks 59 Sentrum,
4001 Stavanger

Besøksadresse:
Lagårdsveien 44, Stavanger

T: 51 56 87 00
F: 51 52 03 00
E: fmropost@fylkesmannen.no

www.fylkesmannen.no/rogaland

Løyve til å plante utanlandske treslag til juletreproduksjon, gnr/bnr 86/2 Fister, Hjelmeland

Tønnevik AS v/ Peter Sigmundstad får løyve til utsetting av nordmannsedelgran og fjelledelgran på gnr/bnr 86/2 i Hjelmeland kommune. Formålet er juletreproduksjon. Løyvet gjeld for 10 år. Det er sett vilkår om at alle tre skal fellast innan 15 år etter planting.

Vi viser til søknad mottatt 22.02.2017 om løyve til planting av utanlandske tre til juletreproduksjon på gnr/bnr 86/2 på Fister i Hjelmeland kommune.

Heimel

Utsetting av utanlandske treslag krev godkjenning frå Fylkesmannen i samsvar med *forskrift om utsetting av utanlandske treslag til skogbruksformål (25.05.2012 nr 460)*, jf. naturmangfaldlova kap IV.

Søknaden

De søker om utplanting av 22 000 tre av nordmannsedelgran (*Abies nordmannia*) og fjelledelgran (*Abies lasiocarpa*) på eit 30 daa stort areal, innteikna på kart vedlagt søknaden. De opplyser i søknaden at 15 000 av desse trea allereie er planta ut dei siste 3 åra (2014, 2015 og 2016), men at det for desse ikkje har blitt søkt om løyve til utplanting av utanlandske treslag før no. I tillegg ønsker de å plante til eit nytt juletrefelt med om lag 7000 planter av nordmannsedelgran og fjelledelgran. Dei to felta ligg om lag 150 meter frå kvarandre. Begge felta er på tidlegare dyrka mark som dei siste åra har vore nytta som beite.

Fylkesmannen sin vurdering

Føremålet med forskrifta er å hindre at planting av utanlandske treslag gir uheldige konsekvensar for naturmangfaldet. Det er sentralt å sikre at forvaltingsmåla for naturtypar og artar ikkje blir trua av dei framande artane, direkte eller indirekte, jf. naturmangfaldlova §§ 4 og 5. Alle offentlege vedtak som kan ha verknader for naturmangfaldet skal vurderast etter naturmangfaldlova §§ 8 – 12.

Det er uheldig at det ikkje er søkt om løyve før planting for trea som allereie er planta ut, men vi vurderer her det eksisterande plantefeltet som om tiltaket ikkje har funnet stad. Vår vurdering er at desse felta kan behandlast under eitt, da dei begge legg beslag på same type areal og søknaden gjeld for same treslag på dei to felta.

§ 8 sett krav om at vedtak bygger på kjend kunnskap. Nordmannsedelgran er ikkje vurdert av Artsdatabanken som ein art med kjend risiko for naturleg spreiding eller følgereffektar i norsk natur (Norsk svarteliste 2012). Fjelledelgran er vurdert til låg risiko for spreiding (LO). Det er ikkje verna område, naturtypar eller kjende artar i nærleiken som kan bli uheldig påverka av plantinga. Areal som plantefelta legg beslag på består av tidlegare dyrka mark som dei siste åra har vore nytta som beite. Felta grensar til hogstfelt, skog (lauvskog og barskog, ulike treslag) og bustadstomter.

Ut frå føre-var-prinsippet (§ 9) er det viktig å sikre seg mot at plantefelta kjem ut av kontroll, ved at trea ikkje får nå alderen for frøspreiding. Risiko for spreiding blir handtert gjennom vilkåra til løyvet. Påverking av økosystemet skal vurderast ut frå samla belastning som økosystemet er eller blir utsett for (§ 10). I dette høvet kan vi ikkje sjå at tiltaket legg beslag på, eller er vesentleg trugsmål mot, stadeigne naturkvalitetar.

§ 11 adresserer ansvaret for eventuelle skader på naturmiljøet til tiltakshavaren. Kostnader ved å bøte på eventuelle skadar eller førebygge skadar skal dekkast av tiltakshavar, så langt dei er innanfor rimelege grenser.

Driftsmetodar og teknikkar skal i utgangspunktet ta best mogleg omsyn til naturmiljøet, slik at resultatet gir dei beste samfunnsmessige resultata (§ 12). Vi har ikkje spesielle merknadar til dette i denne saka.

Samla vurdering

Vi kan ikkje sjå at planting av desse treslaga vil vere til vesentleg skade for naturmangfaldet. Dei aktuelle treslaga har ikkje stor risiko på svartelista, og det er ikkje registrert spesielle naturverdiar som kan bli trua av tiltaket på, eller umiddelbart ved, plantefelta. Det er likevel viktig å sikre seg mot eventuell frøsetting. Det er nødvendig å dokumentere rutinar for å hindre spreiding, og kven som har ansvar for å sikre hogst før frøsetting. Det er og viktig at dette dokumentet blir gjort kjend og overført samtidig som eventuelt eigarskifte til ny eigar.

Vedtak og vilkår

Fylkesmannen gir med dette løyve til utsetting av nordmannsedelgran og fjelledelgran på avmerka område i kart vedlagt dette brevet. Området er på gnr/bnr 86/2 på Fister i Hjelmeland kommune. Løyvet gjeld for til saman 22 000 planter på to felt målt til totalt 28,8 daa (19,4 daa og 9,4 daa), sjå kartvedlegg. Løyvet gjeld i ti år fram til år 2027.

Det blir sett som vilkår at alle trær som er omfatta av vedtaket skal fellast innan 15 år etter planting. For felta som allereie er tilplanta gjeld same vilkår, der felling må skje seinast i høvesvis 2029, 2030 og 2031 for trea som er planta i 2014, 2015 og 2016. Eigaren av arealet er ansvarleg for felling. Vilkåret for dette løyvet skal gjerast kjent for ny eigar ved eventuelt eigarskifte.

Dette løyvet er berre gitt på bakgrunn av risiko for spreiding av utanlandske treslag, og er heilt uavhengig av handsaming etter anna lovverk. Det er til dømes naudsynt å ha løyve frå kommunen til omdisponering etter jordlova sine reglar når plantefeltet er på dyrka jord. Samstundes vil vi minne om at skogbrukslova med underliggende forskrifter, mellom anna *forskrift om berekraftig skogbruk* (07.06.2006 nr. 593) også gjeld for juletre- og pyntegrøntproduksjon. Her er det også ein del miljøomsyn som må takast, t.d. avstand til vassdrag, myr, osv.

Tiltaket skal ikkje utførast før tidlegast ei veke etter at klagefristen er ute og ein eventuell klage er ferdig handsama.

Klage

De kan klaga på vedtaket innan 3 veker etter de har mottatt dette brevet, jf. forvaltningslova sine reglar. Ein eventuell klage skal sendast til Fylkesmannen i Rogaland. Dersom Fylkesmannen ikkje gjer om eige vedtak, skal klagen handsamast av Miljødirektoratet.

Vedlegg: Kart

Med helsing

Geir Skadberg
landbruksdirektør

Elisabeth Schmidt
rådgivar

Dokumentet er elektronisk godkjent og har derfor ikkje underskrift.

Saksbehandlar: Elisabeth Schmidt
Saksbehandlar telefon: 51568784
E-post: fmroesc@fylkesmannen.no

Kopi til:

Hjelmeland kommune	Vågavegen 116	4130	Hjelmeland
Miljødirektoratet	Postboks 5672 Sluppen	7485	TRONDHEIM